

吳文節公遺集

吳文節公遺集

總目

卷一 奏議

卷二 奏議

卷三 奏議

卷四 奏議

卷五 奏議

卷六 奏議

卷七 奏議

卷八 奏議

卷九 奏議

卷十 奏議

卷十一 奏議

卷十二 奏議

卷十三 奏議

卷十四 奏議

卷十五 奏議

卷十六 奏議

卷十七 奏議

卷十八 奏議

卷十九 奏議

卷二十 奏議

卷二十一 奏議

卷二十二 奏議

卷二十三 奏議

卷二十四 奏議

卷二十五 奏議

卷二十六 奏議

卷二十七 奏議

卷二十八 奏議

卷二十九 奏議

卷三十 奏議

卷三十一 奏議

卷三十二 奏議

卷三十三 奏議

卷三十四 奏議

卷三十五 奏議

卷三十六 奏議

卷三十七 公牘

卷三十八 公牘

卷三十九 公牘

卷四十 公牘

卷四十一 公牘

卷四十二 公牘

卷四十三 公牘

卷四十四 公牘

卷四十五 公牘

卷四十六 公牘

卷四十七 公牘

卷四十八 公牘

卷四十九 公牘

卷五十 公牘

卷五十一 公牘

卷五十二 公牘

卷五十三 公牘

卷五十四 公牘

卷五十五 公牘

卷五十六 公牘

卷五十七 公牘

卷五十八 公牘

卷五十九 公牘

卷六十 公牘

卷六十一 公牘

卷六十二 公牘

卷六十三 公牘

卷六十四 尺牘

卷六十五 尺牘

卷六十六 尺牘

卷六十七 尺牘

卷六十八 尺牘

卷六十九 傳記序

卷七十 書後祭文贊銘

卷七十一 詩

卷七十二 詩

卷七十三 詩

卷七十四 詩詞

卷七十五 賦

卷七十六 賦

卷七十七 試律詩

卷七十八 試律詩

卷七十九

試律詩

卷八十

試律詩

先文節公服官中外垂四十年經濟所施在人耳

目生平雅不欲以文字標榜顧

養原

竊惟三不朽

之義立言與立德立功並重自來名公鉅卿往往

人往風微而後之人披其遺編猶得卽文章以見

其政事焉

養原

追思庭訓愧讀父書若於先人畢

生心血所留不及時哀輯勒有成書以傳諸後撫

衷滋疚奚以自安用是敬謹編排付之剞劂凡得

八十卷第一卷至第三十六卷爲奏議先文節公

入告之言皆據實直陳從無粉飾摺稟具存茲詳
加審閱自非尋常循例奏報暨事屬機密未經發
鈔者悉以登載雖其中間出於同僚之會稟屬吏
之上詳然皆經先文節公斟酌損益理宜並存庶
資攷證至報到任報起程諸摺亦係循例之件則
惟錄其特抒論議及奉有獎勵

批諭者任湖廣時摺稟本無多已遺失無從登載矣第
三十七卷至第六十三卷爲公牘先文節公久膺
疆寄事必躬親雖延幕賓襄辦而一切批檄稍異
尋常者恆手自屬草在江西在雲南皆嘗自加決

擇錄存巨帙茲循其次第詳爲釐訂在閩在浙時
以事尤叢紛居鮮暇日未及擇錄在楚之件亦無
存者僅於遺篋中得在浙官書數紙又由滇赴楚
途次收呈二批謹編入第六十四卷至第六十八
卷爲尺牘亦皆先文節公手自屬草者彙多散佚
茲蓋存十一於千百其中多與同官商榷庶務與
公牘相發明故以次公牘後而一二友朋問訊之
書亦附見焉第六十九卷第七十卷爲文第七十
一卷至七十四卷爲詩先文節公詩文不多作作
輒隨手散失早年之作半已亡去養原十餘年來

檢藏敝簾所存並隨處揆求僅得若干首迨晚年

養原

漸長每遇有所作卽敬錄其副故所存較全

茲於文按體分編詩則以時之先後爲序詩題有

闕者謹就所知補標有不可知卽從闕疑至他人

乞請酬贈祭輓之篇有屬幕客及命

養原

代撰者

概不敢羈入以致亂真詞僅二闕亦早年之作附

於卷末第七十五卷第七十六卷爲賦第七十七

卷至第八十卷爲試律詩皆先文節公官翰林時

手藁亦敝簾所僅存者茲依題分類編次故紙經

蠹間有漫漶謹留其闕未敢妄增又所作在嘉慶

末年於

宣廟之諱有未及避者茲俱敬避至先文節公

殿廷考試諸作惟存散館時之一賦一詩餘皆不可復
得矣咸豐七年丁巳十一月壬辰望

男養原

謹識

吳文節公遺集卷一目錄

奏議

審擬安徽鳳陽府生童滋事一案摺

吳文節公遺集卷一

男養原謹編

奏議

審擬安徽鳳陽府生童滋事一案摺

奏爲訊明生童滋事情形按例定擬恭摺奏祈

聖鑒事竊

臣等奉

命前往安徽查辦事件於良鄉縣途次承准軍機大臣
字寄道光十八年十一月初三日奉

上諭本日據安徽學政王植奏定遠縣民人朱模範因
命案具控經廬鳳潁道票差傳訊有該民人佃主文童

張錦書並其戚武生方汝勲文童方汝興等將硃票毀
匿糾約多人直入道署捏稱被道差毆傷驗無傷痕署
鳳陽縣知縣許道藩行抵道署有懷遠武童張鎮寰等
持刀砍傷縣役又據該道稟稱鳳陽府府考時有聚賭
一案曾經該縣查拏恐係挾嫌乘機滋事等語生童糾
眾滋事最爲惡習况事非干已膽敢擁入監司衙署逞
兇滋鬧不法已極亟應查明懲辦以挽澆風惟據該學
政奏該道府各稟獲犯先後情節間有未符生童等於
奉票傳人何以遽行挺身滋擾該差役等有無索詐情
弊亦應澈底根究著湯金釗吳文鎔卽將全案人證提

省研訊確情按律定擬具奏原摺著鈔給閱看將此諭令知之欽此遵

旨寄信前來臣等當卽飛咨安徽撫臣轉飭鳳陽府將全案人證卷宗提集解省以憑訊辦去後嗣於是月十四日行抵山東鄒縣復奉

諭旨著臣等仍遵前旨秉公嚴審按律定擬具奏等因欽此並奉鈔發安徽撫臣色卜星額原奏一件臣等於

是月二十八日馳抵皖省卽准撫臣將解到犯證張錦堂等及全案一併移送惟首犯方珍鑑在逃未獲隨向該犯之子方汝勲究出藏匿處所劄飭鳳陽府委員跟

蹤將該犯弋獲解案復查此案滋事根由是否道差查傳朱模範起釁抑係該生童等懷挾鳳陽縣挈賭夙嫌乘機報復係屬緊要關鍵詰據張錦堂等僉供與前案賭犯吳鳴謙等素未謀面無嫌可挾劄詢該縣許道藩投遞親供亦稱與前辦賭案無涉隨督同隨帶司員刑部員外郎祥麟黃恩彤吏部主事夏恒刑部主事易棠提集各犯逐加研鞫緣方珍鑑係定遠縣已革文生與該縣文童李蘭香懷遠縣已革文生李培德武童張鎮寰文童周春和劉淮清邵樹南朱瑤姚錦盤鳳陽縣已革武生於會鳳宿州文童李心平靈璧縣文童趙一山

均先不認識已革武生方汝勲文童方汝興均係方珍鑑之子文童張錦書係方珍鑑妻姪朱模範係張錦堂之叔張兆清家佃戶其子朱克祥先於本年六月二十日晚因私放公共塘水被村鄰張吉成及伊子張榮升截傷身死報縣請驗緝獲張吉成訊供通詳批飭覆訊在案十月初間學臣按試鳳陽府屬張錦書與方汝勲方汝興先後赴郡應試同一寓所朱模範隨往服役因憶及伊子被張吉成等共毆致斃不應僅將張吉成一入獲案起意上控卽煩來郡應試之定遠縣文生周鶴年代作呈詞給與筆資錢四千文當於初八日攜帶呈

稟煩代書程殿一繕寫赴廬鳳潁道衙門呈遞該道核與縣詳情節懸殊恐有訟師教唆情弊卽遣值日頭役曹炳陳沅執持硃票帶同程殿一指傳朱模範訊供以憑押發鳳陽府提案審辦曹炳等轉差散役趙魁顧琮隨同程殿一前往查傳朱模範索看差票因並未鈐印疑係假票並因票內註有押發字樣不願隨往維時方珍鑑先於初九日來郡同寓朱模範卽偕張錦書持票給看俛其代辨真僞方珍鑑以旣無印信卽係假票之言答覆並囑朱模範將票扣留趙魁等因索票不給回向曹炳等告述曹炳陳沅帶同趙魁等復至方珍鑑寓

所方珍鑑與朱模範均避不見面曹炳等當向方汝興索還原票方汝興聲稱票係假捏必須面見該道方能給還曹炳等以方汝興幫護朱模範匿票抗傳稱欲帶送道署究辦彼此扭結走出方珍鑑恐方汝興受虧令方汝勲張錦堂趕往看視行至中途瞥見方汝興馬褂撕破卽向曹炳等理論方汝興乘間回寓曹炳等當將方汝勲張錦堂帶進道署稟經該道飭委巡捕官訊問正在辦理間詎方汝興回寓後向方珍鑑訴述被曹炳等扭扯情形並稱肚腹疼痛方珍鑑見其衣破氣喘一時氣忿起意將方汝興帶往道署驗傷希圖將曹炳等

責懲卽囑方汝興詐爲傷重不能行走令雇工蘇富背負同往道署經過考棚街沿途撞遇生童向問方珍鑑卽以伊子已被道差毆傷腸斷性命莫保向各生童訴述一路互相傳說各生童咸抱不平漸集漸多隨同方珍鑑擁入道署聲冤喧嚷並求該道驗明傷痕懲辦道差經該道飭委巡捕官曉諭未散該府陳照聞鬧趨至會營挈獲方汝興方汝勲張錦書及隨同喧嚷之劉淮清姚錦盤並在彼觀看之李培德於會鳳邵樹南朱瑤李蘭香等十人方珍鑑乘間逃逸該縣許道藩旋亦踵至行抵道署轅門內適有續往幫鬧之生童等持輦向

署門擲打致將該縣玻璃轎窗打碎該縣飭役查拏差役羅貴見張鎮寰立石臺嚷鬧當卽捕捉張鎮寰圖脫情急用刀砍傷羅貴右額角棄刀欲逃差役張維廖寅上前幫捕亦被抓傷當卽就獲並獲在場擲輒之周春和隨同觀看之李心平趙一山三人餘人均各逃散經該道府飭縣督同仵作王林查驗方汝興並無傷痕並驗明羅貴等各傷填單附卷稟經學臣撫臣先後奏奉諭旨交臣等提案訊辦據各供悉前情臣等以方珍鑑等膽敢直入監司衙門藉端滋鬧若非預行糾約何能遽集多人至道差曹炳等果無索詐別情何致激成眾

怒逐一嚴詰據方珍鑑堅供伊與張鎮寰等均非素識
無從糾邀且道差與伊子扭結赴署時已傍晚各生童
在道署喧鬧甫屈更餘爲時無幾伊亦何能預行邀約
委因詐稱伊子被毆傷重以致各生童聽聞懷忿一時
烏合迨被挈究旋即星散伊實不能指出姓名並據朱
模範供明曹炳等委無向其索詐擾累各情弊歷經提
集各犯證反覆研究眾供僉同應卽擬結查例載刁徒
直入衙門挾制官吏其不係干已事情別無冤枉發近
邊充軍又別項罪人拒捕但係刃傷及刃傷以下仍照
律加本罪二等問擬各等語此案已革文生方珍鑑因

在寓服役之朱模範赴道署具控命案奉差傳訊輒因
查非印票囑令朱模範匿票抗傳本屬事不干已迨道
差曹炳等將伊子方汝興扭結送署中途走回並無冤
枉該犯復詐稱伊子被毆傷重令雇工背往道署驗傷
以致各生童代抱不平隨往喧鬧雖訊明並非預行糾
約與擅自聚眾者不同實屬意存挾制自應照例問擬
方珍鑑應照刁徒直入衙門挾制官吏其不係干已事
情別無冤枉發近邊充軍例擬發近邊充軍張鎮寰因
聞知方汝興被道差毆傷前往道署幫同滋鬧卽屬爲
從復因被挈圖脫將縣役羅貴等拒傷平復自應按別

項罪人拒捕例仍照本罪加等問擬張鎮寰應照爲從減等律於方珍鑑軍罪上減一等杖一百徒三年仍加拒捕罪二等擬以杖一百流二千五百里周春和隨往道署擲輒劉淮清姚錦盤同場喧嚷均屬附和助勢周春和等三犯俱應照爲從減等律於方珍鑑軍罪上減一等擬杖一百徒三年以上各犯分別定地起解到配折責安置拘役張鎮寰據供孀婦獨子情節較重應不准其查辦留養方汝興詐稱傷重訊係聽從伊父方珍鑑主使惟於曹炳等向索差票不肯付給致肇衅端張錦書於佃戶朱模範呈控被傳並不囑令投審迨方珍

鑑令朱模範將票扣留又不勸阻均屬不合應與進署
觀看致被挈獲之李培德於會鳳邵樹南朱瑤李蘭香
李心平趙一山俱照不應重律杖八十李培德係文生
於會鳳係武生業因本案咨革應毋庸議方汝興等七
犯均折責發落曹炳陳沅奉票傳人私令散役趙魁顧
琮代替前往追查知朱模範匿票抗傳又不向該道稟
明輒向方汝興索票爭扭並將其馬褂撕破雖訊無索
詐別情迹近滋擾曹炳陳沅應革役俱照不應重律杖
八十酌加枷號一箇月滿日折責發落方汝勲聽從伊
父方珍鑑隨同曹炳等前往道署係在未經滋事之先

且已罪坐伊父應與訊無不合之散役趙魁顧琮仵作
王林代書程殿一及受傷平復之縣役羅貴張維等均
毋庸議方汝勲係武生前經咨革應予開復朱克祥被
張吉成等戮斃原案仍由安徽撫臣審擬另疏具

題朱模範呈控各情亦應歸於彼案訊明擬結在逃之
已革文生周鶴年緝獲另行究辦前獲賭犯吳鳴謙等
業經鳳陽縣分別擬責發落應免提質廬鳳潁道胡調
元飭差查傳朱模範訊供濫用無印白票本屬違例嗣
方珍鑑及生童多人進署喧鬧又不親身曉諭彈壓將
該道差卽時飭發該府查訊以服眾心迨具稟時復失

於詳查輒稱恐由該縣查拏賭博一案挾嫌起衅所稟
獲犯情形亦有舛錯實屬辦理未協應請

旨交部議處所有失察文武生員滋事之各教官應由
學臣查取職名咨部核議再旌德縣民金貴寶呈遞封
章一案臣等現已提集人犯研訊一俟續提之要證解
到卽行審擬覆奏外所有生童滋事審明定擬緣由理
合恭摺具

奏伏乞

皇上聖鑒飭部核覆施行謹

奏道光十八年十二月十七日奏奉

硃批刑部議奏欽此

吳文節公遺集卷二目錄

奏議

審擬安徽民人金貴寶京控摺

吳文節公遺集卷二

男養原謹編

奏議

審擬安徽民人金貴寶京控摺

奏爲京控命案訊明致死確情並究出主唆各犯按律
定擬恭摺奏祈

聖鑒事竊照安徽旌德縣民人金貴寶赴刑部門口自
刎身死呈遞封章控稱伊子金有應姪孫金成寶因戴
位被毆身死案內經安慶府委審各員非刑拷逼等情
一案於道光十八年十月二十六日由刑部具奏

臣等

奉

旨前往安徽查辦於抵省後咨准撫臣將全案卷宗及
在省人證金有應金成寶金四德戴哭呂九生戴按卽
戴良按戴布卽戴良佈戴輝劉昇耀戴大戴善淦戴鍾
孝戴杏沅戴觀喜周延葉自都等十六名一併解到臣
等督同隨帶司員刑部員外郎祥麟黃恩彤吏部主事
夏恒刑部主事易棠核卷提訊查金貴寶所控各情惟
劉昇耀串通按察司書吏劉德修向承審委員賄囑舞
弊一節最關緊要當向劉昇耀並提到劉德修卽劉淇
隔別嚴究據劉德修堅供此案係由安慶府會同委員

審辦尙未定案詳解到司伊何能從中舞弊並據劉昇
耀供稱實無向懷甯縣賁緣囑託情事伊與金貴寶亦
素無嫌怨惟與已故之戴兆潢及其子革生戴焜夙有
訟嫌恐係戴焜主使金貴寶將伊牽控等語查戴焜係
原案有名要證先經臣等咨會撫臣將該犯與屍兄戴
萬案証戴劉氏等一併飭提旋據委員將戴焜挈獲解
審當向究出曾給金貴寶代作封章當堂飭令默寫前
段字句均屬相符因思金貴寶原遞封章旣出戴焜之
手其劉昇耀等如何賄囑戴焜自必洞悉根由當飭指
出說合過付之人以憑根究詎該犯不能確指研詰至

再始據供稱伊聽聞趙大成號鞵鋪曾爲劉昇耀過付
賊銀詰以其人係何姓名又不能指出隨飭府將開設
趙大成號鞵鋪之趙福貴趙同開查傳到案據供伊等
均係小買賣營生向不出入公門劉昇耀亦素不認識實
無代爲說合過付情弊質之戴焜無可置喙俯首認誣
傳訊承審之安慶府知府劉耀椿潁州府同知徐青照
及並未承審之懷甯縣知縣曾元炳訊取親供查覈無
異一面提集卷證及續行解到之屍兄戴萬縣差梅華
等設法究出戴按等重利盤剝並戴位因倩金有應等
裝傷賴債以致因傷身死及呂九生教唆戴按等疊次

京控各情訊據各犯逐一供認連日提犯覆加研鞫緣
呂九生籍隸旌德縣先因犯案擬徒發配逃回與戴焜
金有應金成寶金四德戴按戴布戴大戴輝等俱係村
鄰素識戴位係戴焜疎遠族人與戴按等同姓不宗道
光十年間該村民人劉文樹等假以太平水龍局救火
爲名興立月會放債漁利每七折錢一千文先扣利錢
四十文以一月爲期二分起息逾期倍罰又於其間攪
放印子錢每七折錢一百文按日交利錢四文以十七
日半爲期利侔於本呂九生戴按戴布戴大戴輝均有
月會戴按等並放印子錢貧民被其盤剝多懷怨恨十

五年九月間金有應金成寶金四德因欠戴按等利債無償商同屢被盤剝之戴哭戴純芳及在逃之劉觀海未到之湯求等多人飲酒會議欲行控究金成寶旋與族人金文漪等先後赴該縣及甯國府衙門疊次具控經該府縣出示禁止查傳戴按等避匿未到所有放出利債仍行催討十六年八月初間金成寶與金文漪等赴藩司衙門控告批准親提維時戴位亦因積欠月會利債過多無力措還所收田稻均被債主戴大等取去抵算欠項戴位心生忿急經伊子戴觀喜等勸慰二十三日戴位在田穫稻又被債主戴彪戴大妹全行搬回

戴大踵至復向戴位索欠爭論而散二十四日戴位途
遇伊兄戴萬向告前情自稱難以度日復經戴萬向其
勸解戴位窘迫無奈因與金有應等俱係戚好又知其
與戴大正在涉訟卽於二十五日晚間找見金有應商
議金有應當令同居之金四德將金成寶劉觀海邀至
其家沽酒共飲戴位聲稱伊稻盡無存難以糊口所欠
月會錢文明日又復屆期無從設措意欲裝傷向各債
主圖賴免致逼索金有應等亦因被利債盤剝懷忿卽
以伊等呈控月會一案業蒙藩司提究若裝傷前往債
主必懷畏懼之言答覆戴位卽免令代爲做傷金有應

等應允因家中恐人知覺未敢下手至半夜時金有應順攜鐵梭金四德攜木棍劉觀海徒手金成寶攜燈籠照路與戴位同行至汪家巖迤北地方曠野無人戴位躑卧地上令金有應等代爲裝傷金四德用木棍毆傷其左腮頰右臂膊右乳劉觀海接過木棍亦毆傷其左膝左右脇肋金有應用鐵梭戳傷其右額顱歇手戴位因傷太輕微囑金有應等於伊頭面多做傷痕以便賴人攢毆金成寶順拾石塊毆傷其右眼胞鼻梁劉觀海撩棄木棍亦拾石塊毆傷其右額角金有應復用鐵梭毆傷其左額角不期失手毆傷其左太陽虛怯處所戴

位喊痛金有應等當卽住手詎戴位傷重旋卽殞命金有應畏懼商同金四德解下戴位腰繫麻繩拴扣頸上裝做被毆後自縊身死因素悉戴位拖欠戴大利債最多起意移屍懸挂戴大門首希圖卸罪卽令劉觀海背負屍身金有應幫擡屍腳行至中途值戴哭在地看守芋頭路遇查問金有應等因與戴哭素好向告前情囑勿聲張當將屍背至戴大門首因聞犬吠慮人知覺不及懸挂置放門首各散所有木棍鐵梭均已沿途掠棄至二十六日五更時戴大開門瞥見屍身因天色近曉不及遠移卽將屍身拖入伊家柴房內藏匿於是夜二

更後轉邀姪孫戴鍾孝幫同背屍移送村前三元殿廟後空地而回先是戴位之子戴觀喜因戴位於早間赴戴杏沅家幫工至晚未回往向戴杏沅之母老戴劉氏查問並通知伊伯戴萬轉煩族人戴重幫同查找無蹤嗣戴觀喜於二十七日瞥見屍身卽同伊母戴汪氏並戴萬前往宗祠向祠長生員戴兆經監生戴兆潢等泣訴求爲作主報官戴兆經等向問致死情由戴汪氏答以伊夫平日與人無讎惟積欠戴輝戴布戴大戴品戴福保戴樹福戴連麻呂狗戴彪戴大妹等利債錢文屢被催索恐係因此被毆致死亦未可知戴兆經等起意

將各債主指控以便追究正兇旋因戴彪戴大妹均係戴兆經親房戴連麻戴樹福又與戴兆經等素好呂狗復至祠內央求均未指控僅將戴輝等五人開載詞內並因戴布之兄戴按會因索討利債威逼劉八慶致死擬杖有案亦一併列入戴萬等於二十八日赴縣具稟經前任知縣何鍾謨詣驗差緝戴輝等均畏累逃避嗣經緝獲戴純芳戴鍾孝到案訊據戴鍾孝供明幫同戴大移屍等情復向戴純芳嚴究戴純芳混供曾見戴輝戴布戴品等將戴位共毆致斃傳到戴輝之妻戴劉氏審訊先不承認加以掌責亦經誣認知情經該縣錄供

詳緝詎戴按因被誣不甘起意京控卽倩呂九生代作呈詞伴送進京以戴兆經戴兆潢等藉戴位命案結眾抄搶等情赴都察院控告咨回安省發前任安慶府朱國經訊明戴兆經等並無藉案抄搶情事戴輝旋亦赴省報審供明並無與戴布等共毆戴位身死戴劉氏戴純芳亦俱翻異前供經該府將戴按照律擬杖其戴位命案發回該縣就近另行訪緝詳經撫臣咨准部覆在案戴輝於發回該縣後與戴純芳同押公所因戴純芳病重戴輝代爲照料湯藥詰以從前因何妄攀戴純芳深自悔恨卽以素與戴哭同居曾經戴哭告述撞遇劉

觀海等移屍情由向戴輝訴述戴輝當囑縣差周延代爲稟官周延未敢遽信致未具稟戴純芳旋即病故戴輝於提審時供訴前情經署任知縣吳秉忠差傳戴哭到案僅將金成寶劉觀海含糊供出飭拏未獲嗣該縣張景星接任提訊戴哭因病重恐受拖累翻異前供旋即因病保釋該縣復查照前詳票差嚴緝戴布等以憑質訊維時呂九生已被獲在縣監禁戴劉氏因伊夫戴輝訊釋無期即進監找向呂九生商議經呂九生代作冤單交戴劉氏攜出兇人照繕多張到處粘貼戴布亦因被挈情急令呂九生之母呂許氏進監囑呂九生代

作詞稿將戴哭劉觀海等列入併將戴兆經戴兆潢等一併牽告戴布旋卽起身進京赴都察院具控而戴兆潢等亦已聽聞卽遣戴兆潢之子戴焜戴兆經之子戴善淦帶同僕人葉自都冒屍子戴觀喜之名進京赴都察院控告先後咨回安省發安慶府併案提訊當向戴哭究出目覩金有應金成寶金四德劉觀海移屍各情並據金四德供認與金有應金成寶劉觀海將戴位其毆致斃屬實提訊金有應金成寶堅不承認經該委員等屢加熬審並向屍子戴觀喜究出戴兆經戴兆潢戴焜等主唆上控各情因戴兆經戴焜屢提未到先將在

案之戴兆潢訊供斥革收禁並將戴兆經戴焜一併斥革嚴提戴焜因父子俱被斥革心懷不甘並因接到伊父戴兆潢手書及歇家羅德發來信均稱伊父收禁後被監內人凌虐需索一時情急適值金有應嗣父金貴寶亦因聞伊子屢被熬審不知伊子實有毆死戴位情事恐致屈問重罪往向戴焜商議欲行赴京呈控戴焜答以此案已京控三次若仍咨回安省審辦終難翻案金貴寶情急聲稱伊情愿赴部院門口拚命申訴戴焜卽起意爲金貴寶代作封章囑令赴京呈遞並令伊弟戴喜及姪孫戴倫盛伴送進京金貴寶到京後卽將封

章挾藏懷內赴刑部門口自刎身死經刑部搜出封章具奏奉

旨交臣等前赴安徽查辦臣等調閱金四德原供金成寶因向戴位索欠在其家內喚出與伊等共毆斃命查核卷內有屍妻戴汪氏呈出戴位生前自記帳簿一本利欠累累並未載有金成寶欠項研究屍子戴觀喜堅供伊父是日並未回家金成寶亦無往喚伊父之事是金四德原供顯有不確復向悉心究審始據供吐前情當提金有應金成寶隔別研鞫該犯等因真情業已透露不待刑嚇均各俯首供認無異臣等以金有應等如

果僅爲戴位裝傷何至毆斃其命且時當昏夜地屬曠野質證無人難保非飾詞避就至金有應毆傷戴位身死罪有應得金貴寶卽欲京控翻案亦何至輒以身殉情節均屬可疑復提各犯反復究詰據金有應等堅供伊等與戴位均係戚好無嫌委因戴位積欠利債不能償還窘急難堪商令裝傷抵賴伊等亦因被月會重利盤剝各懷夙忿因而聽從裝點傷痕不期失手致傷身死如有謀故別情伊等以四毆一何難毒毆重傷若係鬪毆致斃屍身何以並無掙扎擦磕傷痕祇求詳察等語檢查原驗屍格戴位身受木器傷色僅微紅鐵石各

傷亦止皮破並無一傷抵骨核與金有應等供情脗合
並據屍子戴觀喜屍兄戴萬供出戴位身死前數日因
被債主準折稻穀又因月會利債屆期連日忿急情形
厯厯如繪足徵金有應等所供戴位欲圖裝傷賴債之
處並非假捏復據金有應供稱伊與嗣父金貴寶係兩
處居住伊事後亦不敢向嗣父告知是以並不知情訊
之金成寶等及金有應之妻金俞氏僉供金貴寶實與
金有應向不同居是金貴寶不知伊子毆斃戴位情由
誤信爲實有冤抑迫欲申雪以致情急自戕亦可想見
反覆推鞠各供不移逸犯劉觀海等弋獲無期應卽擬

結查例載審理詞訟究出主唆之人若係積慣訟棍卽依棍徒生事擾害例問發雲貴兩廣極邊烟瘴充軍又軍民人等呈遞封章挾制入奏核其誣告罪應擬流者發極邊足四千里充軍又律載受情爲人傷殘因而致死者減闕殺罪一等又地界內有死人不報官司檢驗輒移他處者杖八十各等語此案呂九生因案擬徒在配逃回不思歛迹輒以不干已事代作呈詞伴送戴按進京具控迨被獲監禁復爲戴劉氏編造冤單並代戴布作詞京控實屬積慣訟棍怙惡不悛自應照例問擬呂九生除逃徒輕罪不議外合依積慣訟棍依棍徒生

事擾害問發雲貴兩廣極邊烟瘴充軍例擬發雲貴兩廣極邊烟瘴充軍仍照奏定章程以極邊足四千里爲限照例刺字據供親老丁單情節較重不准留養已革生員戴焜因伊父戴兆潢主唆上控訊供收禁輒爲金貴寶代作封章令在逃之伊弟戴喜等伴送進京呈遞卽與自行呈遞無異查封章內指捏戴輝爲正兇係因該前縣未能審明率行詳緝所致卽牽及劉昇耀賄囑各情並無贓數均難坐誣惟所控戴按毆死戴位一節如果屬實戴按罪應擬絞今訊係虛誣依律反坐罪應擬流加徒白應照例問擬戴焜除明知金貴寶欲赴京

自戕不向勸阻輕罪不議外應依軍民人等呈遞封章
挾制入奏核其誣告罪應擬流者發極邊足四千里充
軍例擬發極邊足四千里充軍金有應因戴位免爲裝
傷賴欠輒與金四德金成寶等代爲傷殘以致戴位因
傷殞命查戴位身受各傷均屬輕淺不至戕生惟被金
有應用鐵梭毆傷左太陽係屬致命虛怯處所其爲此
傷致死無疑應以金有應當其重罪金有應除移屍輕
罪不議外應照受倩爲人傷殘因而致死減鬪殺罪一
等律於其毆人致死下手致命傷重絞罪上減一等擬
杖一百流三千里以上三犯分別定地起解到配折責

安置金四德金成寶幫同金有應代戴位裝傷應於共
毆餘人杖一百罪上減一等擬杖九十戴大簪見戴位
屍身並不報官相驗輒因畏累將屍移至他處亦應按
律問擬戴大應依地界死人不報官司檢驗輒移他處
者杖八十律擬杖八十戴鍾孝幫同戴大移屍應依爲
從減等律於戴大杖八十罪上減一等擬杖七十戴按
戴布戴輝訊無將戴位毆斃情事惟重利盤剝致肇釁
端若僅照違禁取利律擬笞殊覺輕縱戴善淦隨同戴
焜假冒屍子戴觀喜之名赴京具控雖係聽從父命亦
未便竟置不議均應照不應重律杖八十以上八犯均

折責發落監生劉昇耀訊無實緣賄囑情弊惟屢經涉
訟有案卽係恃矜多事應卽斥革追照咨部塗銷屍子
戴觀喜並無受賄誣執戴哭所證得實應與訊無不合
之屍兄戴萬案證戴杏沅戴劉氏及聽從伊主作抱京
控之葉自都並未受賄之書吏劉德修縣差梅華周延
均毋庸議趙福貴等均屬無干卽予省釋戴兆潢主唆
屍親上控本干律擬業已在監病故應與呈遞封章自
刎身死之金貴寶均毋庸議案已訊明未到之屍妻戴
汪氏及人證戴福保等俱免提質以省拖累在逃之已
革監生戴兆經及劉觀海戴喜戴倫盛戴彪戴大妹戴

品等各犯緝獲另行究辦兇器鐵梭木棍據供均已撩棄事隔多年無從查起戴位所欠錢債身死免追呈出帳簿附卷備查戴兆潢前在懷甯縣監禁究被何人需索凌虐現訊戴焜不能確指提到過付羅德發等供亦游移已扎委安徽臬司嚴訊確情另案擬結戴布等兩次京控原案應由安徽撫臣分案咨銷前任旌德縣知縣何鍾蘭審理戴位命案並不虛衷研鞫率據戴純芳一面之詞輒向戴劉氏掌責嚴訊致將戴輝指爲正兇通詳飭緝雖尙未獲犯成招實屬草率安慶府知府劉耀椿潁州府同知徐青照委審此案業經究出金有應

等係共毆戴位致死正犯惟於金四德捏供金成寶索欠起釁未能研訊明確致金有應等得以藉詞狡展堅不承招審理究未得實應請交部分別議處所有失察逃徒呂九生回籍滋事並失察呂九生在監代寫呈詞冤單之各該管官應由撫臣查取職名咨部議處懷甯縣知縣曾元炳並未承審此案亦無聽受劉昇耀囑托情事應免置議再查月會印子錢等項名目重利盤剝爲害貧民現據案犯僉供該縣禮村留村等處月會多至三十八班屢經府縣示禁未能杜絕應請

飭下安徽撫

臣

嚴行禁止利債槩免追償仍責令該縣

知縣隨時稽查毋令市僧故智復萌以杜訟端而安閭里所有臣等審明定擬緣由理合恭摺具

奏伏乞

皇上聖鑒飭部核覆施行臣等於拜摺後卽率同司員遵

旨前往浙江查辦事件合併陳明謹

奏道光十八年十二月二十八日奏奉

硃批另有旨欽此

吳文節公遺集卷三目錄

奏議

查明浙江省被參各員及有關鹽務各款摺

查明江甯藩司被參各款摺

吳文節公遺集卷三

男養原謹編

奏議

查明浙江省被參各員及有關鹽務各款摺

奏爲遵

旨查明浙江省被參各員及有關鹽務各款恭摺覆

奏仰祈

聖鑒事竊

臣等於安徽省城承准軍機大臣字寄道光

十八年十一月二十五日奉

上諭有人奏浙江省吏治民風日漸玩擾請飭查究等

語案關職官吸食鴉片煙門丁包娼架賭承審官擅用
非刑及署缺之員訛索銀兩並甲商冒領庫欸劣生挾
制索謝如果屬實自應嚴行查辦着湯金釗吳文鎔於
查辦安徽事竣後馳赴浙江將摺內所指各情節秉公
確查應訪察者密加訪察應提訊者迅卽提訊務期事
事核實無枉無縱按律定擬具奏湯金釗籍隸浙江著
無庸迴避原摺著鈔給閱看將此諭令知之欽此遵

旨寄信前來臣等於查辦安徽事竣後飛咨浙江撫臣

烏爾恭額將被參各員及應訊人證預行調集臣等於

十九年正月十八日馳抵浙江省城後咨會撫臣將各

案卷宗一律檢齊送案隨督同隨帶司員刑部員外郎
祥麟黃恩彤吏部主事夏恒刑部主事易棠查照原摺
內指參各款悉心核訊除前署西安縣知縣萬啟芬已
據撫臣咨報於上年十月二十五日病故其生前有無
吸食鴉片煙無從查訊外如原摺內所參岷縣知縣何
瑞榴縱容門丁劉姓包娼架賭並爲劉姓生辰歛金五
百劉姓現在紹興府城內大木橋買房又聽從已革復
充書吏沈楊枝卽沈清楊把持公事以致士民憤激罷
考官聲平常皆未參劾一欸查前任岷縣知縣何瑞榴
業經撫臣以該員才力不及於上年

大計案內

題參撤任現已調省隨將提到之書吏沈楊枝門丁劉漢山隔別研訊據劉漢山供伊並無包娼架賭歛金置產各情弊其紹興府城內大木橋房屋係伊同主門丁業經逐出之劉珍卽劉寶山價典劉珍曾因生辰科歛分金沈楊枝素所深悉劉珍現逃何處委不知情等語覆訊沈楊枝卽沈清楊供稱伊前充該縣戶書於道光十二年緣案奉府斥革經庫書沈慶春邀伊進署幫同辦事該縣門丁劉珍曾於十七年十月間因值生辰通知各房書吏及各班頭役湊送分金約計洋銀六十餘

元並無五百金之多嗣因該縣考試眾童生公同稟請
該縣將劉珍驅逐該縣因眾怒難犯卽將劉珍逐出各
童亦卽入場實無罷考之事復詰以劉珍如何包娼架
賄及把持何項公事該犯與劉漢山均稱實不知情傳
到劉珍妻弟姚坤據供劉珍在前任紹興府知府色
卿額署內服役於道光十年間在府城內大木橋地方
價典朱姓樓房上下六間挈眷居住嗣於十五年始赴
嵎縣跟官現有房主朱姓可以查訊等語臣等以劉珍
各項劣蹟業經沈楊枝等供出端倪惟係同署丁胥誠
恐代爲隱飾因思該縣何瑞榴業經撤任後任無所用

其迴護將案內緊要情節逐層指駁劄飭紹興府督同該縣按欵嚴查去後旋據該府覆稱委員會同該縣訊據書差魏贊代等供明湊送劉珍分金共計洋銀六十四元並訪得該前縣於縣試時曾派劉珍督役將各童生搜檢因劉珍擅加呵叱以致各童生心懷不平公同上堂稟請該前縣將其驅逐屬實至該門丁如何包娼架賭訪查並無實跡亦未被控有案其大木橋樓房六間實係劉珍於十年八月間向房主朱成之價典在未往嵯縣跟官數年以前查訊朱成之供詞無異錄供加結一併申送傳到該前縣何瑞榴取具親供查核相符

惟在逃之門丁劉珍屢飭嚴拏尚未獲案又原摺所參
署杭捕同知韓姓向娼戶訛索洋銀三百元添索規禮
經杭府稟揭僅令撤任一欵查韓姓卽係候補通判韓
紹晉已於上年九月間請假措資回陝西原籍經撫臣
咨提未到臣等留心察訪該員官聲甚屬平常後調集
各原案查核該員先於上年五月間委署杭捕同知任
內經署藩司熊常鐔署臬司宋國經風聞該員辦理公
務不治輿情札飭升任杭州府文柱查明該員辦事未
盡妥善詳請記過撤委嗣經督臣鍾祥批飭覆核復經
該署司等以該員尙無實在劣蹟詳覆在案臣等以該

員如果向娼戶訛索得贓貪鄙已極杭州府究竟會否稟揭復札飭前署臬司杭嘉湖道宋國經確查詳覆實無杭州府稟揭韓紹晉向娼戶訛索得贓添索陋規案據臣等查韓紹晉雖無贓私實據惟以佐貳閒曹既經該上司訪查撤任復有人指欺糾參其平日居官不知檢束動滋物議已可概見又原摺所參甲商祝逢吉於積引改餘案內指稱部費冒領庫銀三萬六千兩有向充相關辦商之生員許澄慮卽許梅生指控訛詐該省將運司衙門立本堂領款每年一千二百兩作爲酬謝以致戴邦濟顧源興等效尤滋事戴邦濟吸食鴉片亦

不敢究一欵訊據祝逢吉供稱浙綱積引壅滯經院司於十五年間奏請暫停餘引專疏積引奉部議覆准行當因暢引首重緝私經伊與同事甲商金裕新等稟請在於商捐雜欵項下借領銀三萬六千兩作爲巡費當於沿江濱海各口岸分別首要次要實力偵緝嗣伊於十六年間因另案革退甲商旋經金裕新等酌議將前項借領巡費銀兩在於甲商應領

恩賞小值月項下分年扣還完欵均有原案可稽如果有指費冒領情弊眾甲商何肯代爲攤還至許梅生本名乃烈卽係相關辦商許永和曾於十六年間請領巡

費稟控有案旋於朱紹昌京控案內具結請銷是時伊已革退甲商何須向其賄和況立本堂乃眾甲商辦公之所一切經費均交司事商人王錫章給發許梅生亦無從支領惟上年春間因王錫章年老患病曾經金裕新等稟司延請許梅生之姪許澄慮幫辦筆墨伊並不預聞且相距許梅生稟控原案業經二年之久委非以堂內領款作爲酬謝戴邦濟顧源興亦未效尤滋事等語檢查各項案據與所供僉符傳訊甲商金裕新許榮豐俱俱膺合訊據生員許澄慮供稱伊胞叔許梅生前曾稟控巡費伊是時年甫十八並不知情至伊於上年

幫辦立本堂事務歲支修金四十兩亦與祝逢吉無涉
傳訊許梅生供亦無異臣等以許澄慮與許梅生雖非
一人究係同胞叔姪安知非扶同影射領銀朋分當將
久在立本堂司事之王錫章傳案訊據供稱立本堂自
乾隆五十八年設立以來卽經眾甲商延伊司事維時
額設經費銀二千四百兩嗣經道光二年十二年兩次
清查遞減爲一千二百兩一切公費本屬有絀無贏且
伊尙有墊發嘉慶十四五六三年公費銀兩屢經稟請
未蒙發給有案可稽豈有伊名下墊欸未歸轉將領欸
全數給與許梅生之理察其情詞似屬可信並據戴邦

濟顧源興供稱伊等自充商以來既未控告他人亦未
被人控告許梅生等以前稟控各案伊等均未列名從
何效尤滋事劄飭運司查覆該商等實無滋事實跡許
梅生亦無另有控告別案其戴邦濟吸食鴉片一節據
供伊因患胃痛病症曾於道光八九年間吸食鴉片煙
數次旋即戒絕等語恐有捏供情事當將該商人提至
當堂嚴加搜檢熬審一晝夜察看精神如舊並無煙癮
情形其爲先吸後戒尙非虛捏又原摺所參甯海梟棍
章文明章澄清化名王武侯等藉官行私經控不辦一
款溯查此案先於道光十三年二月間經台商張京振

稟控甯海商人生員章文明等開設私行十三處盤踞
售私等情經升任運司宋其沅詳請飭縣嚴拏並移會
黃巖鎮總兵轉飭該管營汛一體協緝因日久未獲復
詳請將該縣邱以德記過並將章文明先行斥革嗣經
撫臣烏爾恭額劄飭台州府知府陳大溶督同該縣及
委員鹽大使仰朝丙前往該處將章志旺等所開私行
十三處全行拆毀並將先後解到人證鍾升秦等發交
杭州府會同甯紹分司訊辦因章文明等屢提未到犯
供游移難以定讞於十八年四月間發回台州府就近
督拏訊辦在案又於十六年三月間據台商樓四宜張

存誠等以甯海縣臬棍章澄清招臬潑販等情先後稟
控飭鞫復據台商王武侯以章澄清係伊商夥並非私
臬具呈代爲申辯嗣後張存誠等與王武侯卽各以化
名朦充等情互相攻訐屢控不休經前任運司王鑄飭
委署甯紹分司王贊業提同章澄清等質訊兩造各執
一詞因人證章高和等未經提到致未辦結等因亦在
案臣等前於奉

旨查辦後卽咨會撫臣轉飭將章文明章澄清王武侯
等按名嚴鞫迄今仍未弋獲是此案業經該省將章文
明斥革嚴鞫並將私行全行拆毀尙非置之不辦其王

武侯與張存誠等係屬互相訐控究係何人化名滕充
非提集人證質訊亦驟難懸擬惟自十三年飭拏以來
迄今已閱五年屢經該上司嚴檄飭催仍未將章文明
等按名獲解該管文武各員緝捕懈弛實難辭咎以上
各欵均經臣等調齊案卷提集人證按欵查核悉心研
訊情節均屬相符自應將應議各員分別參處查前任
岷縣知縣何瑞榴於革書沈楊枝進署影射辦事及門
丁劉珍向書差等科欵分金均漫無覺察嗣劉珍於縣
試搜檢時呵叱諸童復不加約束直至眾童生公同稟
請驅逐嘖有煩言始將劉珍逐出了事跡涉徇縱該員

現經撫

臣列入

計典參劾仍應請

旨交部嚴加議處前署杭捕同知候補通判韓紹晉雖查無實在劣蹟惟先經該管上司查明該員辦公未協詳請記過撤任臣等留心體訪官聲甚屬平常實難望其勤慎奉職應請勒令休致所有緝拏章文明等日久無獲之該管文武各員應由撫臣查取職名咨部分別議處戴邦濟訊無滋事訛詐別情其先曾吸食鴉片煙據供久已戒絕復經熬審察看屬實究未便竟置不議該商人係捐納州同職銜應卽斥革以示懲儆仍追照

咨銷祝逢吉許乃烈許澄慮顧源興訊無冒領訛詐各情弊應與訊無不合之劉漢山等俱毋庸議金裕新等俱屬無干卽行省釋沈楊枝卽沈清楊前充岷縣戶書因案斥革復在經承沈慶春名下辦事罪有應得該犯現有被縣民王思才等控告浮收錢糧交紹興府提審一案沈慶春亦被牽控案內均應歸於彼案訊明從重擬結其在逃之章文明章澄清王武侯及門丁劉珍均應由撫臣勤限嚴拏務獲另案究辦再查原摺內稱浙省於鴉片煙並未嚴拏等語查據撫臣咨稱自上年至今各屬拏獲煙犯一百五十餘名起獲煙土煙膏九千

一百餘兩並收繳煙槍煙具多件業經兩次具奏等因
應仍由撫臣欽遵歷奉

諭旨飭屬嚴拏務期有案必破以挽澆風又原摺所參
候補運判周詒械王葆生等在甯紹分司任內承審滙
戶楊浩控案將楊浩之子楊森茂套用腦箍並於本年
五月二十三日不理刑名之日借用錢塘刑阜宋姓倪
姓用木車套訊數次該上司因該場于昌達與楊浩有
嫌知而不究一欵查周詒械違例刑訊楊茂勝卽楊森
茂各情先經撫臣訪聞奏參革審臣等復提集犯證訊
出大概供情正在覆訊核辦間接准撫臣咨會現奉

上諭將該員周詒械暫行革職交該撫嚴究確情按律
定擬具奏等因應由撫臣訊明具奏完結其究竟有無
套用腦箍木車之處臣等已摘錄原參各情節咨會撫
臣查照訊辦至候補運判王葆生訊供並未會同周詒
械承審此案調查委審及具詳各原卷均無王葆生銜
名石堰場大使于昌達亦訊明並無與楊浩有嫌之事
應俱毋庸議所有臣等查明參辦緣由理合恭摺具
奏伏乞

皇上聖鑒訓示遵行謹

奏道光十九年二月初五日奏奉

硃批另有旨欽此

查明江甯藩司被參各款摺

奏爲查明藩司被參各款恭摺覆奏請將該司交部議處仰祈

聖鑒事竊臣等於浙江省城承准軍機大臣密寄道光十九年正月十九日奉

上諭有人奏江甯布政使唐鑑前經呈報伊女孝行由部覆准竟於江甯省城外天界寺相近地方託上元縣紳士汪鄴樓督工建立專祠以致愚民聚會燒香男女混雜又聞該藩司胞弟唐紫玖現住省城之壽星橋恐

開不肖屬員夤緣鑽刺之弊現在陶澍患病請假稟件
係藩司代行而唐鑑亦係病軀終年不去藥餌於地方
公事恐有廢弛等語各省孝子節婦准予旌獎者例應
在本籍建坊若如所奏該藩司於任所爲伊女建祠已
屬違例又致愚民聚會燒香該藩司豈毫無覺察至伊
弟唐紫玖是否住居省城有無倚勢招搖劣蹟唐鑑是
否患病現代陶澍辦理稟案有無廢弛之處着湯金釗
等於浙江審案事竣後順赴江甯逐款查明如有前項
情弊據實參奏將此諭令知之欽此遵

旨寄信前來臣等查該藩司唐鑑爲伊女建立專祠並

伊弟唐紫玖在省城居住既有天界寺壽星橋確切地
址自應密加查勘以便根究當於二月十七日馳抵江
省卽密委隨帶司員刑部員外郎祥麟黃恩彤不動聲
色徑往天界寺等處詳細查勘旋據該司員等面稟勘
明天界寺前殿西北土埂以外有唐孝女墳一塚墳前
舊立碑坊各一座復至天界寺佛殿僧房周履詳勘均
無另設孝女專祠訪得該寺住持僧嚴盛因招集僧尼
男婦拜佛傳戒已於去年十二月間被挈羈禁等情並
鈔錄孝女墳前碑文呈驗臣等查閱亦無敘及建祠之
事隨後札飭該府督縣覆勘繪圖貼說具文申報查與

該司員等初勘無異一面飭傳紳士汪鄴樓並監提犯
僧嚴盛到案督同隨帶司員隔別研訊據汪鄴樓卽汪
度供稱伊係上元縣學生員前於捐賑案內在局董事
十五年春間總督欲將賑餘銀兩改建

社稷壇仍派伊經手承修伊卽隨同本省司道在天界
寺迤北相定地基維時唐藩司在江安糧道任內因見
寺旁隙地尙多囑伊代覓一處葬其已故孝女之柩伊
卽向寺僧嚴盛說允因係寺中公地不便價賣經唐藩
司給香資銀二十五兩由伊轉交嚴盛收受迨後造墳
建坊均係唐藩司自行派人經理伊並未與聞亦未代

爲督工另建孝女專祠等語訊之嚴盛供亦脗合臣等
以原奏內本有天界寺相近地方建立唐孝女祠以致
愚民聚會燒香混雜之語而該寺僧嚴盛現因招集男
婦入寺致被查拏安知非於寺內曾經私設孝女牌位
假託名目藉以惑眾斂錢未便以勘無專祠遽置不究
隨調取該省拏辦嚴盛全案卷宗查有歲貢生吳啟元
等屢以嚴盛不守清規具控在案因思嚴盛如有假託
孝女詞聚會燒香情事吳啟元等必不肯代爲隱瞞當
卽飭傳吳啟元及聯名具控之汪汝華等五人到案訊
據僉供天界寺附近祇有唐孝女墳坊並未建立專祠

卽嚴盛招集僧尼男婦亦係以拜佛傳戒爲名與唐孝女並無干涉伊等環居寺旁耳目切近不敢妄供等語
揆核供情俱屬可信至壽星橋房屋一所亦經該司員
等勘明係該藩司唐鑑故父唐仲冕祠堂唐紫玖卽唐
鎮先曾在內居住現已回籍隨將看房之捐職未入流
陳碩齡家丁郭來興傳訊據陳碩齡供稱唐紫玖係伊
母舅先在伊外祖唐仲冕祠內與伊同居於本年正月
二十二日回山東省墓至唐紫玖素患目疾不能見客
並不與江省官員往來無從夤緣鑽刺等語研訊郭來
興供亦相同臣等以該藩司於女故後旣因孝行

題准

旌表何以不送柩回籍反在任所借地安葬建坊其故
父唐仲冕又何以在江省建設祠堂至其弟唐紫玖既
不隨任何必時來江省既來江省何以並不進署究竟
在外有無與屬員交結該司必不至毫無聞見當復逐
層指駁札飭該司切實登覆去後旋據覆稱該司次女
惠觀於十四年七月在伊前任江安糧道署內病故該
司因原籍家內無人不能歸葬於十五年春間借葬天
界寺旁隙地嗣伊女因孝行

題奉部覆准其建坊

旌表該司當於十六年三月將隨墓建坊緣由稟明督撫批飭准行所有建坊立碑均係家屬修理至壽星橋房屋本係該司已故族伯唐景昌游幕江南時於嘉慶八年接買秦姓之宅該司故父唐仲冕自陝西藩司罷官後在江甯居住迨身故後該司卽將此房改爲祠堂該司胞弟唐鎮卽唐紫玖本係浙江候補運副因目疾不能當差時來江省就醫卽在故父祠堂居住該司莅任後欲令搬入署內唐鎮因進署後延醫不便是以在寓閉門養病不能接見外客實不聞有與屬員交結往來之事等語臣等詳加體訪唐紫玖尙無倚勢招搖劣

蹟再該藩司是否患病現代督臣陶澍辦理稟案有無廢弛一節臣等此次出差兩過江省目覩該司氣體雖素不充腴而一切語言步履均無患病情形復咨會督臣將該司代行期內標判文案及承行書吏一併送案訊據書吏朱棣之等二十三人僉供自總督患病請假後所有題奏咨部及緊要事件仍由總督自行閱判其尋常日行事件係歸藩司代行伊等各房稟案應歸代行者均係彙入一箱封送藩署唐藩司俱隨到隨判並無耽延積壓情弊懇加研訊衆口一詞復將該司代行稟件按簿抽查委無遲滯查該藩司唐鑑於代行公事

尙無廢弛亦無爲伊女建立專祠致愚民聚會燒香之事惟身任大員防範諸宜愼密輒於伊弟唐鏌前來江省任令在署外居住雖查無倚勢招搖劣蹟究屬不合應請

旨將該藩司交部議處除僧嚴盛一犯應由該省審明另案辦理餘人卽行省釋外所有臣等查訊緣由理合恭摺具奏伏乞

皇上聖鑒訓示施行謹

奏道光十九年二月二十一日奏奉

硃批另有旨欽此